



UPA 2019/137

04. April 2019

Bentiaraq Ottosen

**Illerfinnik angerlaassilluni assartuinnermut ikiorserneqarsinnaanermut piumasaqaatinik illuinnaasiunngitsunik aalajangersaalluni pisortanit ikiorsiissutit pillugit malittarisassat atuuttut allangortinneqarnissaannik siunnersuummik Naalakkersuisut kingusinnerpaamik UPA2020-mut saqqummiussaqaarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Aqqaluk Heilmann, Atassut)

Siunnersuuteqartup tunngavilersuutigisaa isumaqatigilluinnarparput.

Kalaallit Nunaata avataanut nunattalu iluani katsorsartikkiartorlutik aallartartut ilaqarput toqussartik tikillugu katsorsartittartunik. Tamanna ilaqutariinut akisuupilussuuvoq illerfimmik angerlaassilluni assartuinnermut ikiorserneqanngikkaani.

Illerfinnik angerlaassilluni assartuisarnermut ikiorserneqarsinnaaneq susassaqaartuni ersarissarneqartariaqarpoq, uani pineqartut aallaavigalugit Kommuniniit ikiorserneqartarnerup tamakkiisumik aqqinneratigut angusaqartoqarsinnaammat.

Ilaqutariit suliffitsik qimallugu katsorsartittoq sivisuumik peqataaffigisinnaasarpaa, tamanna ilaqutariinut aningaasaqarnikkut killilersuisorujussuusarluni. Ilaqutariit imminut napatittut aallavigissagutsigit ilaqartarput illutik, biilitik, umiatsiatik akigeriarlugit aallartartut. Tassa ullormut aningaasartuutissat imaluuniit illerfik angerlaannissaanut assartuinnermi akissaqarumallutik, tamakku pinngitsoortinneqarsinnaapput ilaqutariit aningaasaqarnikkut saniatigut ikiorserneqarpata.

Siunnersuutip qiterivaa massakkut inatsimmi malittarisassaasut ersernerlunneri, kommunenilu nalorsaatigineqarsinnaasarluni kina qaqugukkullu taperneqarnissaanut pisussaaffeqarnerlutik. Siunnersuut inatsip imarisaanik allangortitsissanngilaq, qulakkeerinnissallunilu pisariaqartitsivissortut ikiorserneqarnissannik.

Toqusup timaanik ikuallaaveqarsinnaaneq pillugu Naalakkersuisut suliaqartut ilisimavarput, tamanna Inatsisartut suleriaasianni §37 imm.1 naapertorlugu Naalakkersuisunut apeqquteqaammi nr. 149-2018 apeqquteqarnitsinni akineqarpugut. Tamanna suli ilisimaneqanngimmat misissuinerlu aallartereermat suli naliliisoqarsimanngitsoq ilumut toqusup timaanik ikuallaaveqartoqarnissaa, inuiaqatigiillu taamannak kissaateqarnerat ataqqineqartoq oqaatigineqarluni.

Illerfimmik angerlaassilluni assartuusineq isumaqarpugut ileqqorissaarnikkut ikiorserneqarnissaq pisariaqartoq, taamaattumik tamatuminnga siunnersuuteqartup tigussaasumik suliaqarnera ingerlateqqinneqartariaqartoq.

Taamatut oqaaseqarluta una siunnersuut taparserparput, Peqqissutsimut Ilaqutareeqarnermullu ataatsimiititaliamut innersuullugu.